

Communicaziun a las medias

DA LUNSCH DAVENT: RTR ha chattà passa 200 RumantschAs a l'ester

Cuira, 04-06-2015 – Las Rumantschas ed ils Rumantschs èn derasai per l'entir mund. Radiotelevisiun Svizra Rumantscha (RTR) tschertga dapi il favrer tut ils Rumantschs a l'ester e fin uss avain nus chattà passa 200 persunas. Tgi che fa in clic sin la charta mundiala interactiva sin rtr.ch/dossiers po vesair, tgi che viva nua.



Da sanester Reto Camichel coiffeur en l’Africa dal Sid, Adula Camichel victura dal bon da viagir, Paula Nay redactura da la Televisiun Rumantscha

RTR ha organisà dus dis d’acziun nua che las audituras ed ils auditurs han pudì telefonar ed annunziar lur chars che vivan a l’ester. Bleras mammas han raquintà ch’i saja stà grev da laschar ir lur uffants e ch’ellas laschian savens encrescher. Insaquants han er udi dal project ed èn s’annunziads direct tar RTR. En tut ha RTR survegnì var 80 telefons e 50 annunzias per e-mail.

Tut tgi che ha annunzià insatgi u è sez s’annunzià, ha gi la schanza da gudagnar in bon da viagir sponsorà da Capricorn ed Engelreisen. L’entschatta da matg è vegnì tratg la sort. Adula Camichel da S-Chanf ha gi fortuna. Ella aveva annunzià ses figl Reto ch’è coiffeur en l’Africa dal Sid. Reto Camichel è emigrà cun var 20 onns da l’Engiadina giudim l’Africa dal Sid e quai senza discurren in pled englais. La mamma Adula nizzegia la chaschun e va cun il bon a visitar il figl.

Mumentan fa RTR in pitschen casting. Sin las undas dal Radio Rumantsch vegnan 15 persunas intervistadas ed il “Telesguard” rapporta davart 3 persunas che vivan en l’exteriur. Il november 2015 vegnan las intervistas ed ils rapports emessas sin ils chanals da RTR. Annunzias d’ulteriurs Rumantschs pon anc adina vegnir tramessas a: davent@rtr.ch

Dapli infurmaziun:

Radiotelevisiun Svizra Rumantscha

Paula Nay | e-mail: paula.nay@rtr.ch | tel: 081 255 75 75